

Asocijacija Fatma, Općinski odbori Kantona Sarajevo i Udruženje porodica nestalih općine Ilijaš organizovali su predavanje na temu „Masovne grobnice u BiH“, a predavač je bio predsjednik Komisije za traženje nestalih FBiH Amor Mašović. Pred oko 300 posjetilaca u ilijaškoj kino dvorani, Mašović je uz video projekciju prisutne upoznao sa najvećim masovnim grobnicama u BiH koje su nakon rata otkrivene od Krajine do istočne Bosne, od Hercegovine do Posavine. Potresna svjedočenja potkrijepljena slikom pokazala su svu monstroznost zločinaca koji su neselektivno ubijali stotine ljudi samo zato što se zovu drugačije. Duboke jame i bezdani, bagerom iskopane goleme grobnice godinama su skrivale tijela nevino ubijenih i istinu o njima i njihovim ubicama. Mnogi od prisutnih nisu znali da je najveća otkrivena masovna grobnica u BiH, otkrivena kod Zvornika, sadržavala preko 620 posmrtnih ostataka ubijenih Bošnjaka.

- Ovo je djelić petnaestogodišnjeg traganja za ubijenim u koji sadrži osvrt na 22 najveće od oko 700 grobnica u cijeloj BiH koje sadrže posmrtno ostatke oko 20 hiljada ubijenih. – rekao nam je prije predavanja Mašović. On se posebno osvrnuo na genocid u Srebrenici, znajući da se veliki broj raseljenog stanovništva Srebrenice nalazi u Ilijašu, istakavši da se i pored 8372 ubijena Bošnjaka, genocid u Srebrenici još nije završio jer se još uvijek traga za tijelima nestalih.

Govoreći o Ilijašu, Mašović je istakao da je na području ove općine dosad otkriveno 48 grobnica, od kojih je 6 masovnih, u kojima su pronađena 152 tijela ubijenih. Od ovog broja 17 tijela nije identificirano. Prema podacima Komisije za traženje nestalih, u Ilijašu se još traga za 47 žena i muškaraca sa područja općine Ilijaš.

Nakon predavanja i gledanja dokumentarnog filma, prisutni su imali priliku postavljati pitanja predavaču i dobiti informacije “iz prve ruke” o procesu traganja za novim grobnicama i tijelima stradalih.